



XUNTA DE GALICIA

PRESIDENCIA

Secretaría Xeral para o Deporte
Comité Galego de Xustiza Deportiva

Estadio Multiusos de San Lázaro
15781 SANTIAGO DE COMPOSTELA
Tfno.: 981 957509 - Fax: 981 542638
E-mail: secretaria.deporte@xunta.es

galicia

Data 13/1/2014

Asunto	Destinatario
ENVÍO RESOLUCIÓN Expte 53/13	Pdte. Federación Galega de Automobilismo Carretera de Vigo, 43 baixo. O Pino 32001 Ourense



Como Secretaria do Comité Galego de Xustiza Deportiva, remítolle RESOLUCIÓN ditada por este Comité.





En Santiago de Compostela, a 13 de xaneiro de 2014, reunido o Comité Galego de Xustiza Deportiva en sesión plenaria celebrada o día da data, resolveu o recurso RN 53/2013, interposto a partir do recurso presentado por don **M.V.B.**, con licenza número GA – da Federación Galega de Automobilismo e na súa condición de participante na XL subida a Chantada celebrada os días 27 e 28 de xullo de 2013, polo que recorre contra a resolución do Comité de Apelación da Federación Galega de Automobilismo de data 12 de setembro de 2013 pola que se estima o recurso de apelación formulado polo piloto da **E.A.T.C.** don **C.R.A.** fronte á decisión do colexio de comisarios deportivos que acordara a exclusión de don **C.R.**: da citada proba como consecuencia do recurso formulado polo participante aquí recorrente.

ANTECEDENTES DE FEITO

PRIMEIRO.- Con data 18 de outubro de 2013 tivo entrada no rexistro do Comité Galego de Xustiza Deportiva o recurso presentado, en data 11 de outubro de 2013, por don **M.V.B.**, titular da licenza número GA – da Federación Galega de Automobilismo e participante na XL subida a Chantada, contra a resolución do Comité de Apelación da Federación Galega de Automobilismo de data 12 de setembro de 2013 pola que se estima o recurso de apelación formulado polo piloto da **E.A.T.C.** don **C.R.A.** fronte á decisión do colexio de comisarios deportivos que acordara a exclusión do mesmo da citada proba, como consecuencia do recurso formulado polo participante aquí recorrente.

SEGUNDO.- Por providencia de 21 de outubro de 2013 accordouse admitir a trámite o recurso co número 53/13 e dar traslado do mesmo ao Presidente da Federación Galega de Automobilismo (FGF), para que, por quen corresponda, remitira expediente e informe sobre o mesmo, no prazo de dez días, e dándolle traslado asemade para alegacións a don **C.R.A.** competidor sancionado coa expulsión e cuxo recurso foi estimado polo Comité de Apelación da Federación.

Con data 7 de novembro de 2013 tivo entrada no rexistro do Comité Galego de Xustiza Deportiva o expediente e informe remitidos pola Federación Galega de Automobilismo, co resultado que obra no Expediente.

Igualmente con data 7 de novembro de 2013 tiveron entrada no rexistro do Comité Galego de Xustiza Deportiva as alegacións presentadas pola **E.A.T.C.** concursante coa licenza GA – do vehículo número 2 marca T Castor TC3, conducido por don **C.R.A.** na proba XL Subida a Chantada, co resultado que obra no Expediente

TERCEIRO.- Por providencia de 22 de novembro de 2013 declarouse concluso o expediente, poñéndoo de manifesto aos interesados, a fin de que, se o entendían oportuno ou necesario, fixeran alegacións finais.



Transcorrido o prazo conferido, recibíronse as alegacións presentadas polo recorrente don M.V.B. , mentres que non se formularon por parte de don C.R.A.

Foi relator D. M.J.S.

FUNDAMENTOS DE DEREITO

PRIMEIRO.- Dos datos do expediente resulta que o recorrente participou os días 27 e 28 de xullo de 2013 na XL a Chantada e fixoo coa Escudería á que pertence, a I.M.S.

Baseábase a reclamación nunha conduta antideportiva e en irregularidades cometidas polo participante don C.R.A. na proba XL subida a Chantada, consistente en ter alegado unha inexistente avaría no vehículo para poder modificar o posto de saída, postergándoo, na proba e así aproveitar que o chan do percorrido xa estivese seco cando él tomase a saída.

A reclamación inicial do agora recorrente, don M.V.B. , fixose no momento da celebración da proba ante os comisarios da XL subida a Chantada pola Escudería á que pertence, tal e como recoñece no recurso ó afirmar “*nuestra escudería I.M.S. , con NIF y con número de licencia GA..... interpone una reclamación en el autobús federativo... .*” . No expediente remitido pola federación figura a acta número 3 dos comisarios deportivos na que, no seu punto terceiro, se fai constar que a “*a escudería I.M.S. y en representación del participante nº7 D. M.V.B. que previo pago de la caución, contra el participante nº2 D. C.R.A.*” .

A devandita reclamación foi estimada polos comisarios, accordándose a exclusión da proba do citado participante.

A E.A.T.C. que participaba con don C.R.A. como conductor, formulou recurso perante o Comité de Apelación da Federación Galega de Automobilismo solicitando que se deixase sen efecto a sanción de exclusión acordada polos comisarios deportivos, fundamentando a petición na nulidade da resolución por non ter sido oído e térselle provocado indefensión e por terse adoptado a decisión sen que existisen probas dos feitos denunciados.

O Comité de apelación, tras dar traslado ós Comisarios Deportivos, que emitiron informe, ó recorrente e a tódalas escuderías participantes na proba, acordou, sen entrar no fondo do asunto, estimar o recurso integralmente por considerar que a escudería E.A.T.C. co piloto don C.R.A. fora sancionada coa exclusión da competición sen ser previamente oído polo colexio de comisarios, o que supoñía vulneración do seu dereito de audiencia e por tanto vulneración do procedemento sancionador.



SEGUNDO.- Dos datos e feitos postos de manifesto e que se desprenden do expediente remitido resulta evidente que na tramitación do recurso por parte do Comité de Apelación da Federación si se respectaron os principios de audiencia e contradición dos interesados. E elo porque en contra do que afirma o recorrente si consta acreditado que unha vez admitido a trámite o mesmo, ademais de solicitárselle informe ós comisarios deportivos e dársele traslado ó recorrente don **C.R.A.** acordouse e déuselle de xeito efectivo traslado a tódolos participantes na XL subida a Chantada, a través das escuderías participantes, facendo constar precisamente a necesidade de darlle traslado a todos os interesados posto que a estimación do recurso podía facer variar a clasificación final da proba.

Como se deixó dito supra, o recorrente don **M.V.B.** foi quien denunciou ante os Comisarios Deportivos a suposta irregularidade cometida por don **C.R.A.** reclamación que foi estimada. Pero esa reclamación foi feita pola escudería coa que participaba o mesmo, a **I.M.S.** E a esta escudería consta que se lle notificou o trámite de audiencia no seo do recurso formulado por don **C.R.A.**, sen que presentase alegación algúnhia.

Non pode entenderse o dereito de audiencia de xeito tan laxo que non se garantice a audiencia do interesado nin de xeito tan estrito que se convirta nun requisito procedural de imposible cumprimento. O dereito de audiencia debe supoñer que os interesados coñezan o procedemento pero non pode supoñer que calquera poida esixir que se lle dea traslado persoal e directo do procedemento. O agora recorrente participou a través da escudería **I.M.S.** e á mesma consta que se lle deu traslado do recurso de apelación. Con este traslado, presentase ou non alegacións, enténdese cumprido o deber de dar audiencia ós interesados. Non pode pretenderse como parece pretender o recorrente, piloto da escudería, que o traslado sexa individualizado, xa que elo podería convertir o cumprimento do dereito de audiencia nunha obriga de imposible cumprimento.

TERCEIRO.- En canto ó fondo do asunto, este Comité vese na obriga de confirmar a resolución do Comité de Apelación da Federación Galega de Automobilismo, xa que consta recoñecido polos propios comisarios deportivos que se acordou a sanción do participante don **C.R.A.** da **E.A.T.C.**

sen darlle trámite de audiencia ó mesmo.

Tanto o artigo 84 da Lei 30/1992 como o propio regulamento do procedemento sancionador, e os propios estatutos da federación, impoñen que se dea audiencia a aquel que pode ser sancionado. Este regulamento sancionador consagra o principio de necesaria observancia de audiencia do interesado. Pese a iso, os propios comisarios recoñecen no seu informe que non se lle deu trámite de audiencia á escudería **E.A.T.C.** ó seu conductor, don **C.R.A.** Se ben non

ten porqué recorrerse a un trámite escrito ou por un prazo determinado, como consecuencia de que debe resolverse en prazos breves, acordes coa natureza da proba presidida pola necesidade da inmediatez dos resultados, si resulta necesario oír a quen é denunciado e quen pode ser sancionado cunha sanción tan grave como é a da expulsión dunha proba.



XUNTA DE GALICIA

PRESIDENCIA

Secretaría Xeral para o Deporte
Comité Galego de Xustiza Deportiva

Estadio Multiusos de San Lázaro
15781 SANTIAGO DE COMPOSTELA
Tfno.: 981 957509 - Fax: 981 542638
E-mail: secretaria.deporte@xunta.es

galicia

Por todo iso, cabe desestimar integralmente o recurso formulado, confirmando a resolución ditada polo Comité de Apelación da Federación Galega de Automobilismo.

Vistos os preceptos legais citados e demais de xeral e pertinente aplicación,

O Comité **RESOLVE**: desestimar integralmente o recurso RN 53/2013 interposto por don **M.V.B.** polo que recorre contra a resolución do Comité de Apelación da Federación Galega de Automobilismo de data 12 de setiembre de 2013, mantendo a resolución ditada nos seus termos.

Contra esta resolución, que pon fin á vía administrativa, poderase interpoñer directamente recurso contencioso administrativo perante o Xulgado do Contencioso Administrativo competente no prazo de dous meses contados a partir do día seguinte ao da notificación da mesma, de acordo co previsto nos artigos 116 e 117 da Lei 30/1992, do 26 de novembro, de Régime Xurídico das Administracións Públicas e do Procedemento Administrativo Común e artigo 94 da Lei 3/2012, do 2 de abril do Deporte de Galicia.

Dª **R.B.G.**

, Secretaria do Comité Galego de Xustiza Deportiva:

CERTIFICA:

Que no Pleno do devandito Comité en sesión celebrada o día 13 de xaneiro de 2014 na cidade de Santiago de Compostela, se acordou a referida resolución, o que lle notifíco a Vd. na súa condición de parte interesada para o seu debido cumprimento.

En Santiago de Compostela, a 13 de xaneiro de 2014.

